

A Ny filalaovana angatra sy ny fahafatesana:

❖ Fanahy tsy mety maty.

- Ny Baiboly dia mampianatra fa isika dia noforonina hanana “fizarana” telo lehibe: “ny fanahy sy ny aina ary ny vatana” (1 Tes. 5:23). Mampianatra antsika ihany koa ny Baiboly fa mifampiankina ireo ampahany 3 ireo. Ny Genesisy 2:7 dia mampianatra antsika fa Andriamanitra dia namorona vatana, nampidirany aina (fanahy), ary tonga zavamananaina (“aina”, amin’ny teny hebreo, dia nefesh = “fanahy”).
- Rehefa miala amintsika ny fofon'aina dia tsy misy intsony isika. Tsy misy ampahany amin'ny maha-olombelona antsika intsony mbola velona aorian'ny fahafatesana. Maty ny vatana, miverina amin’ny Mpanome azy ny fanahy (herim-piainana), ary tsy misy intsony ny aina, izay vokatry ny firaisan’ny vatana sy ny fanahy (Mpito. 12:1-7; Ezek. 18:20; Joba 7:7-9).
- Hatramin’ny nidiran’ny ota teto amin’izao tontolo izao, dia nampiasa olona nitady hifandray tamin’ny maty i Satana, ka nahazo fahalalana manokana momba ny ankehitriny na ny hoavy.
- Mampianatra ny Baiboly fa “izay rehetra manao izany fanao izany dia ho fahavetavetana eo imason’i Jehovah” (Deot. 18:10-12). Ny sazin’izany heloka izany dia fahafatesana (Lev. 20:27).

❖ Ny fahafatesana ao amin’ny Testamenta Taloha

- Na dia tsy misy aza milaza amin’ny fandevenana hoe “mizotra mivantana any amin’ny helo ny havanay”, dia maro ny fieken-keloka mampianatra fa rehefa maty ny “tsara” dia miakatra mivantana any an-danitra mba hiaraka amin’i Jesosy, ary ny “ratsy” dia voasazy na mirenireny fotsiny. Inona anefa no ampianarin’ny Baiboly momba izany?
 - (1) Afaka midera an’Andriamanitra ve isika rehefa maty? Salamo 115:17
 - (2) Fantatry ny olona maty ve izay manjo ny fianakaviany na ny namany? Joba 14:21
 - (3) Afaka mifandray amin’ny velona ve ny maty? Mpitoriteny 9:6
 - (4) Afaka manohy mieritreritra ve isika rehefa maty? Mpitoriteny 9:5
 - (5) Ho afaka hanao karazana asa rehetra ve isika aorian’ny fahafatesana? Mpitoriteny 9:10
- Ny Testamenta taloha dia mampianatra fa torimaso ny fahafatesana. Matory isika ary tsy hifoha raha tsy rehefa miantso antsika ho amin’ny fiainana Andriamanitra (1 Mpanjaka 2:10; 14:20; Dan. 12:13)

❖ Ny fahafatesana ao amin’ny Testamenta Vaovao

- Ny Testamenta Vaovao dia mampianatra, tahaka ny taloha, fa ny fahafatesana dia torimaso izay i Jesosy irery ihany no afaka mamoha antsika (Jaona 11:11-14; Jaona 5:28-29).
- Rehefa nanoratra ho an’ny Tesaloniana i Paoly dia niresaka tamin’izy ireo momba ireo “izay matory”, izany hoe ireo efa maty, ary nilaza tamin’izy ireo fa hatsangana amin’ny maty izy ireo mba hiaraka amin’i Jesosy amin’ny Fiaviany Fanindroany (1 Tes. 4:13-18). Raha nino i Paoly fa manatona mivantana an’i Jesosy ny mpino rehefa maty, dia ho nilaza izany tamin’izy ireo izy fa tsy izay nolazainy taminy.
- Rehefa niresaka momba ny maty i Paoly, dia nilaza fa hovelomina “amin’ny fiaviany” izy ireo, fa tsy alohan’ny fiaviany akory (1Kor. 15:22-24). Milaza amintsika koa izy fa “tsy isika rehetra no hatory”. Ny velona dia hovana vetivety, fa ny maty kosa hitsangana sahady (1Kor. 15:51-52).
- Ny fitsanganana amin’ny maty no tena fototry ny fiarahana amin’i Jesosy. Raha tsy misy fitsanganana amin’ny maty, dia tsy misy famonjena (1 Kor. 15:13-18). Amin’ny fitsanganana amin’ny maty no handraisantsika ny lovantika, ka tsy maintsy miandry izany fotoana izany isika (1Pet. 1:3-5).

B Ny filalaovana angatra amin’ny andro farany

❖ Ireo famantarana sy fahagagana.

- Ny filalaovana angatra dia hetsika tarihin’i Satana mivantana, ary ny fototra iorenany dia ny tsy fahafatesan’ny fanahy. Ny mpanaraka izany dia mino fa afaka mifandray amin’ny maty izy ireo, ary milaza fa mahazo hery hafa tsy ara-boajanahary avy amin’izy ireo.
- Ho avy ny fotoana hamelan’Andriamanitra azy ireo hanao fahagagana tsy azo lavina izay hahatalanjona izay rehetra mahita azy (Mar. 13:22; 2 Tes. 2:9; Apok. 7:1; 13:13 -14).
- Ny fiarovana amin’izay fantatsika ao amin’ny Tenin’Andriamanitra, sy ny fitokiana tanteraka an’i Jesosy, no ahafahantsika manohitra ny fakam-panahy farany ataon’ny fahavalo (Isa. 8:20; Efes. 6:13).

❖ Ny tanjon’ny filalaovana angatra

- Ny fikasan’i Satana dia ny handresy amin’ny ady ataony amin’Andriamanitra, hanongana ny fanjakany ary hipetraka amin’ny seza fiandrianany (Isa. 14:13-14). Mba hahatanteraka izany, dia hampiasa ny paikady

rehetra izy mba handresena ny olona rehetra, manomboka amin'ny fahefana ara-politika izay mamehy antsika (Apok. 16:12-14).

- “Amin'ny maha-asa ambony indrindra amin'ilay tantara lehibe momba ny famitahana, dia i Satana mihitsy no hisolo tena an'i Kristy” (Hery Mifanandrina Toko 39).
- Amin'izay fotoana izay anefa no hamaranan'i Jesosy ilay tantara (Apok. 16:15). Satana dia fahavalo efa resy. Resin'i Kristy, ary resin'izay mifikitra amin'ny rany (1 Jao. 2:14; 4:3-4; Apok. 3:21; 5:5; 12:11).